

菩薩為衆生說四聖諦



「大智度論」集粹之六十六

智 銘

須菩提白佛言：「若是諸法是菩薩法，何等是佛法？」

佛告須菩提：「菩薩法亦是佛法。若知一切種，是後一切種智，斷一切煩惱習，菩薩當得是法。佛以一念相應慧，知一切法已，得阿耨多羅三藐三菩提。是為菩薩、佛之差別。菩薩摩訶薩無礙道中行，是名菩薩摩訶薩；解脫道中無一切闍蔽是為佛。」

須菩提白佛言：「佛得阿耨多羅三藐三菩提已，得六道生死不？」

佛言：「不得也。菩薩則往來六道中。若衆生知諸法自相空，菩薩摩訶薩不求阿耨多羅三藐三菩提，亦不拔衆生於三惡趣，乃至往來六道生死中。以衆生實不知諸法自性空故，不得脫六道生死。是菩薩從諸佛所，聞諸法自相空，發意求阿耨多羅三藐三菩提。」

是衆生於無所有法中，顛倒妄想分別得法；無衆生作有衆生想，無色作有色想，無受、想、行、識，作有受、想、行、識想。乃至一切有為法無所有，用顛倒妄想心，作身、口、意業因緣，往來六道生死中不得脫。

是菩薩摩訶薩行般若波羅蜜時，一切善法，內般若波羅蜜中，行菩薩道，得阿耨多羅三藐三菩提。得阿耨多羅三藐三菩提已，為衆生說四聖諦：苦、苦集、苦滅、苦滅道。開示分別一切助道善法，皆入四聖諦中；用是助道善法，分別有三寶，何等三？佛寶、法寶、僧寶。不信、拒逆是三寶故，不離六道生死。」

須菩提白佛言：「用苦聖諦得度？用苦智得度？用集聖諦得度？用集智得度？用滅聖諦得度？用滅智得度？用道聖諦得度？」

用道智得度？

佛告須菩提：「非苦聖諦得度，亦非苦智得度，乃至非道聖諦得度，亦非道智得度。是四聖諦平等故，我說即是涅槃，不以苦聖諦，不以集、滅、道聖諦，亦不以苦智，不以集、滅、道智得涅槃。」

若無苦，無苦智，無集、無集智，無滅、無滅智，無道、無道智，是名四聖諦平等。是四聖諦如、不異，法相、法性、法住、法位、實際，有佛、無佛，法相常住，爲不誑不失故。是菩薩摩訶薩行般若波羅蜜時，爲通達實諦故，行般若波羅蜜。

若菩薩摩訶薩如實見諸法，見已得無所有法，得無所有法已，見一切法空，四聖諦所攝，四聖諦所不攝法皆空。若如是觀，是時，便入菩薩位中，是爲菩薩住性地中，不從頂墮，用是頂墮故，墮聲聞、辟支佛地。是菩薩住性地中，能生四禪、四無量心，四無色定。是菩薩住是初地中，分別一切諸法，通達四聖諦：知苦不生緣苦心，乃至知道不生緣道心，但順阿耨多羅三藐三菩提心，觀諸法如實相——卽觀諸法空。

一切法自空相，是菩薩用如是智慧，觀一切法空，無法性可見，住是性中得阿耨多羅三藐三菩提。何以故？無性相是阿耨多羅三藐三菩提，非諸佛所作，非辟支佛所作，非阿羅漢所作，亦非向道人所作，亦非得果人所作，亦非菩薩所作。但衆生不知不見諸法如實相，以是事故，菩薩摩訶薩行般若波羅蜜，以方便力故，爲是衆生說法。」

須菩提問佛：何等是菩薩法，何等是佛法？佛告以：菩薩與佛，色等諸法行處是同，但智慧利鈍有異。菩薩雖如實行六波羅蜜，而未能週遍，未能入一切門，是故不名爲佛。若菩薩已入一

切種智門，入諸法實相中，以一念相應智慧，得阿耨多羅三藐三菩提，斷一切煩惱習，得諸法中自在力，爾時名爲佛。

如向道、得果，同爲聖人而有差別。菩薩亦如是，行者名爲菩薩，從初發心乃至金剛三昧，佛已得果，斷一切法中疑，無所不了，故名爲佛。

佛不墮六道，菩薩則往來六道。若一切衆生自知諸法自性空者，菩薩不發阿耨多羅三藐三菩提意，亦不於六道中拔出衆生。何以故？衆生自知諸法性空，則無所度。今衆生實不知自相空法故，隨心取相生著，以著故染，染故隨於五欲，隨五欲故爲貪所覆，貪因緣故慳、虛誑、嫉妬、瞋恚、鬥諍，以瞋恚故起諸罪業，無所知識。是故，壽終隨業因緣生於彼處，續作生死業，常往來六道中，無復窮已。

是故，菩薩於諸佛及弟子所，聞說諸法空，而慈愍衆生。作是念：衆生以狂顛倒故生著，我當作佛，破衆生顛倒，令解諸法空相。衆生無有定實，但自於無所有中，憶想分別，妄有所得；無衆生中起衆生想，無色中起色想，無受、想、行、識中起識想。以狂顛倒故，是能起身、口、意業，於六道生死，不能得脫。

但若衆生法想，結縛猶輕，易可得度，生貪欲、瞋恚，於是中起諸重業，是爲重縛，受此業果報，則難可得度。菩薩欲破其生死因緣故，於般若中攝一切善法，行菩薩道，得阿耨多羅三藐三菩提，爲衆生說四聖諦，所謂苦、苦集、苦滅、苦滅道。種種因緣開示，敷演。

衆生所畏急者，無過於苦，爲除苦已，然後示以佛道。苦者受五受象身，是一切苦本，性卽是苦，是苦畧而言之，是生、老

、病等。

苦集者，愛等諸煩惱，愛是心中舊法，以是故，佛說愛能生後身，故是苦因，苦因即是集。若人欲捨苦，先當斷愛，愛斷苦則滅，斷愛即是苦滅。苦滅即是道，觀是五象種種因緣，苦及苦集過罪，所謂無常、苦、空、無我。如病、如瘡、如怨、如賊等，於八聖道分中爲正見，餘七事助成發起，能斷一切法中愛。

四聖諦中，攝一切善法，佛說一切助道善法，皆攝在四諦中。助道善法因緣故，分別有三寶。衆生不信三寶，不得離六道生死。然四聖諦中，以四聖諦體故滅？爲用智故滅？若以苦諦得道，一切衆生、牛羊等亦應得道，若用苦智得道，離苦則無智，離苦智則不名爲苦諦，但名爲苦。苦諦、苦智和合故生，不得言但以苦滅，但以智滅，乃至道諦亦如是。

佛說四諦平等即是滅，不用苦諦滅乃至道諦滅，何以故？是苦等四法，皆從因緣生，虛誑不實，無有自性故，不名爲實。不實故云何能滅？

初得道時，知二諦是虛誑，將入無餘涅槃，亦知道諦虛誑，以空空三昧等捨離道諦，如說械喻，滅諦亦無定法，離有爲無無爲，因有爲故說無爲。苦滅如燈滅，是故佛說不以用苦，乃至用道得滅。

所謂四諦平等者，四諦如實、不誑、不異、如、法性、法相、法位、實際，若有佛若無佛法相常住，不用心、心數法及諸觀，但爲不誑衆生故住。一切餘法皆顛倒，妄著顛倒果報生故，雖能與人大喜樂，久久皆虛誑變異。但有一法，所謂諸法實相，以不誑故，常住不滅。如是菩薩行般若波羅蜜，通達諸法實諦。

菩薩思惟籌量求諸法，無有一法可得定相，見一切法皆空，若在四諦，若不在四諦。非四諦者，虛空、非數緣盡；餘者四諦。若觀如是法空，爾時，入菩薩位。菩薩住是性地中不墮頂，性地者所謂菩薩法位，如聲聞法中，煖法、頂法、忍法、世間第一法，名爲性地。是法隨順無漏道故，名爲性，是中住必望得道。菩薩亦如是，安住是性地中，必望作佛，能生四禪、四無量心、四無色定，是菩薩住在禪定中攝心，分別思惟籌量諸法，道達四諦，所謂知見量，亦非緣苦生心。知苦是凡夫受身，著苦因緣故，受諸憂惱，是人身皆如賊、如怨、無常、空等。得是已，即時捨不取苦相，亦不緣苦諦。菩薩法位力故，乃至道諦亦如是。但知一心迴向阿耨多羅三藐三菩提。知是四諦藥病相對，亦不著是四諦，但觀諸法如實相，不作四種分別觀。

如實觀者，觀空。若菩薩能觀一切法若大若小皆空，是名如實觀。自相空能入甚深空中，是菩薩得自相空如是法，觀一切法皆空，乃至不見一法有性可住。得阿耨多羅三藐三菩提，觀諸法如阿耨多羅三藐三菩提。阿耨多羅三藐三菩提亦自性空。非佛所作，非大菩薩所作，非阿羅漢所作、辟支佛所作，常寂滅相，無戲論語言。衆生不能知見如實相，是故菩薩行般若，以方便力，爲衆生說法。

方便力者，菩薩得無生法忍，入菩薩位，通達菩薩第一義諦。觀是道相甚深微妙，無得無捨，用妙智慧不可得，何況可得口說？大悲心深念衆生，以空事故，墮三惡道，受大劇苦，若直說是法，則不信不受，則破壞法，墮於地獄，爲成就一切善法，莊嚴身三十二相，引導衆生，起無量無邊諸佛神力，得成佛道，一切衆中生，於諸法得自在，是菩薩如所願思惟行，爲衆生說，使皆度脫。